

La storie glesieastiche furlane e je uniche te Europe occidentâl

Mi va propit juste ben di dî ce che o vevi ta l'anime di dîus, dopo ce ch'al à dite il professôr Bernardi. Leint chest libri, si inacuarzarês che la storie glesieastiche furlane e je uniche te Europe occidentâl. Patriarcjât diferent di Rome al è nome chel di Aquilee. Un Patriarcjât che fra l'altri al à scugnût fâ politiche, come che a compuartavin i timps. E al à vût par un pôc di timp, par un secul e mieç, ancje il coragjo di dî di no a Rome, e che durant dal "Medioevo" al à vût chel altri coragjo, di jessi simpri de bande dal imperadôr, cuant che al podeve, ghibelin.

Al pâr un câs, ma lis novitâts di religjon in Friûl a rivin simpri in ritart e a cjapin simpri un savôr popolâr. O sin ancje dal pont di viste religjôs une Glesie cuntune fisionomie dute sô. E no je vere che la Glesie e sedi une, ma la Glesie e je veramenti federâl, almancul stant ae Costituzione di Crist, che dal dì des Pentecostis, jo no capîs parcè che nus fasin tantes dificoltàs a lassânus preâ e ... sacramentâ par furlan. E vuê si trate di interpretâ lis robis dal passât te clime di vuê.

O crôt, come che al diseve il professôr Bernardi, che nô o sedin plui o mancul une colonie; une culture, la nestre, par masse timp dominade; o sin un popul ch'al è pierdût il gust di mostrâ la sô muse; fra di nô a comparissin ancje chei che i tegin di dî mancul ch'a puedin dal Friûl, o ... di fevelâ mâl dal Friûl, o di tradîlu: tradîlu economicamenti, tradîlu socialmenti, tradîlu culturalmenti, in tantis formis. O sin un popul ch'al è pierdût la libertât di podê vivi a cjase sô: cent agns di emigrazion. Al somee naturâl che nô o vedin di lâ in vuere, al somee naturâl che nô o vedin di lâ pal mont, che o vedin la fâ la massarie, al somee naturâl che nô o vedi di vê rispîet di chei altris ancje se chei altris no 'nd àn par nô, come il soldât sul atenti, o il camarîr cul cjapiel in man.

Jo mi domandi: la Glesie furlane di vuê, ce posizion ae cjapât? A ducj i riscjos, ancje chei di jessi strumentalizade politicamenti, e à di stâ cun chei che a àn il pît sul cuel, no cun chei che lu metin. Nol è pussibil che la Glesie e resti neutrâl come che e je stade di cent agns. Graziant Idiu, cualchi segno al è, che si le finissi cun chê traine.

S'al è vêr ce che al diseve il professôr Bernardi che la culture di une minorance e je une autentiche culture, no pò tasê se le stan fracassant, se le stan fasint scomparî. Restâ neutrâl sun ches robis culî al vûl dî tradî. Al è stât dite che no varês di interessâsi des robis di chest mont, dome di che di chel altri. Che al sarês come dî che chei ch'a cjalcin a continuin a cjalcjâ. Se e je in chest mont, che si impegni in chest mont. O vin vût un grant om ch'al à riscjât, che al à fat i interès dal so popul, in chest mont, parcè che l'interès astrat nol esist.

No stait a vê vê pôre di impegnâsi, parcè che a cui che al sbalgje ancje impegnantsi in buine fede, si perdonii. Vedarìn se il nestri popul i perdonarà ae Glesie di jessi stade lantan di chescj problemas par tant timp, e di no vê cjapade une posizion clare e precise, par pôre di pierdi la neutralitât religjose.

Isal stât neutrâl Crist se al è stât de bande dai puars!? Jo no pretint di viodi camei a passâ pe buse de gusele, ma almancul alc, sacranon, al à di gambiâ. Jo o vorês viodi la Glesie a impegnâsi, parcè che l'eternitât no scomence cuant che si mûr, ma cuant che si nas.

Pre Checo Placerean

Friuli d'oggi 1-2 1975